

Hronika / Chronik

Izveštaj o radu Centra za balkanološka ispitivanja ANUBiH u 2014. godini

Programske aktivnosti Centra u 2014. godini najvećim dijelom su bile usmjerene na pripremu i izdavanje časopisa Godišnjak/Jahrbuch, kao jednu od trenutno najvažnijih djelatnosti Centra za balkanološka ispitivanja ANUBiH. U prvoj polovini 2014. godine intenzivno se radilo na pripremi časopisa br. 42 za 2013. godinu u kojem su publikovani referati s konferencije "Balkanologija danas". Zbog kašnjenja nekih autora s dostavljanjem rada, broj je izdat polovinom 2014. godine te je odmah zatim upućen u redovnu razmjenu zajedno s knjigom "50. godina Centra za balkanološka ispitivanja" (ANUBiH, Sarajevo 2013). Iako je to bilo planirano, u navedenom broju Godišnjaka/Jahrbucha nije publikovana diskusija s konferencije, koja zbog tehničke greške nije bila u cjelini dokumentovana, što se može uzeti kao jedini propust u inače veoma dobro organiziranoj manifestaciji obilježavanja 50. godišnjice Centra za balkanološka ispitivanja ANUBiH.

Tokom 2014. godine u Centru se radilo na pripremi građe "Lične zabilješke generala Oskara Potioreka" za publikovanje u okviru Posebnih izdanja Centra za balkanološka ispitivanja. Na ovom projektu rade akademik Dževad Juzbašić i prof. dr. Zijad Šehić. Građa ličnih zabilješki generala Oskara Potioreka, šefa Zemaljske vlade u BiH, odnosi se na period od 1911. do polovine 1914. godine, s tim što se razvoj unutrašnjopolitičke situacije prezentira kontinuirano od sredine 1912. godine do početka Prvog svjetskog rata. Ovaj period vrlo je bogat mnogim presudnim zbivanjima za Bosnu i Hercegovinu i balkanski prostor. O tim događajima general Potiorek je vodio iscrpnu korespondenciju prvenstveno sa zajedničkim ministrom finansija i drugim zajedničkim ministrima Austro-Ugarske, s austrijskom i ugarskom vladom, intenzivno je pratio politička zbivanja u Bosanskohercegovačkom saboru često intervenirajući, održavao je bliske veze s domaćim vodećim političarima, kao i drugim javnim radnicima u Bosni i Hercegovini. U svojim zabilješkama on je donosio prepise svojih pisama, kao i pisama koje je dobio od različitih ličnosti i institucija. Ova korespondencija notirana je u organima koji su slali svoje dopise, kao i u onim koji su ih primali. Dio ove građe korišten je od autora koji su tretirali problematiku ovoga razdoblja, ali veći dio je ostao neiskorišten, te se ovom prilikom planira publikovati u okviru Posebnih izdanja Centra za balkanološka ispitivanja. Građa koju je ranije prikupio i selektirao akademik Dževad Juzbašić skenirana je i sređena za objavljivanje. Početkom godine akademik Juzbašić boravio je na istraživanju u Beču, gdje je u Državnom arhivu prikupio preostalu relevantnu građu, nakon čega je uslijedila njena obrada, prekucavanje, lektura. Dokumenti će, kao što su to i originali, biti objavljeni na njemačkom jeziku uz obuhvatan uvod na našem i njemačkom jeziku. Izdavanje knjige očekuje se polovinom 2015. godine. Centar za balkanološka ispitivanja i Akademija nauka i umjetnosti Bosne i Hercegovine ovim projektom će dati doprinos obilježavanju stogodišnjice od početka Prvog svjetskog rata.

Paralelno s time Redakcija časopisa Godišnjak/Jahrbuch radila je na prikupljanju i obradi radova za novi, 43. broj časopisa za 2014. godinu. Aktuelni broj se sastoji iz trinaest radova, pet prikaza i četiri teksta in memoriama. U ovom broju radove su u većini dali autori iz Bosne i Hercegovine (Doboj, Gradiška, Mostar, Sarajevo, Visoko), uz autore iz Hrvatske i Velike Britanije. I ove, kao i prethodnih godina, osigurana je finansijska podrška od strane Rimsko-germanske komisije Njemačkog arheološkog insitituta iz Frankfurta na Majni zahvaljujući angažmanu prof. dr. Blagoja Govedarice, člana ANUBiH, člana Centra za balkanološka ispitivanja i urednika časopisa Godišnjak/Jahrbuch. Za dodatna sredstva upućena je aplikacija na konkurs Fondacije za izdavaštvo Sarajevo.

U 2014. godini održan je jedan sastanak Centra na kojem su prisustvovali sarajevski članovi. Na sastanku je razmatran, te u kontaktu s ostalim članovima Centra usvojen pravilnik o izdavanju časopisa Godišnjak. Osim toga, pokrenuta je i procedura za vraćanje i sređivanje građe Centra za balkanološka ispitivanja koja je 1999. godine predata Zemaljskom muzeju Bosne i Hercegovine prilikom raščišćavanja i izmještanja prostorija Centra za

balkanološka ispitivanja. Jedan dio građe nalazi se u prostorijama Arhiva ANUBiH te je, s obzirom na to da se radi o aktivnoj građi koju Centar i dalje koristi, traženo njeno premještanje radi sređivanja, dalje obrade i korištenja. Centar je uputio i zahtjev organima ANUBiH za dodjeljivanje prostorija koje je su mu pripadale prije rata, radi bolje organizacije rada, kao i deponovanja dokumentacije na jednom mjestu.

Saradnica Centra Melisa Forić je od početka aprila do početka jula boravila u Berlinu u okviru stipendije Tempus projekta na stručnom usavršavanju u primjeni kompjuterskih programa u arheologiji, gdje je učestvovala na zaštitnim arheološkim istraživanjima pri Pokrajinskom zavodu za zaštitu spomenika u Brandenburgu i pohađala predavanja na Institutu za prahistorijsku arheologiju Slobodnog univerziteta u Berlinu. Krajem 2014. godine saradnica Forić odbranila je magistarski rad pod nazivom “Tipološke i kulturološke karakteristike antropomorfnih predstava u umjetnosti Japoda” na Filozofskom fakultetu Univerziteta u Sarajevu.

Melisa Forić